

欽
定
全
唐
文

欽定全唐文卷八百三十五目錄

錢珣 五

代集賢崔相公謝賜官誥表

代集賢崔相公謝賜官誥表

代集賢崔相公謝賜官誥表

代宰相謝示白野鵲表

代宰相宣示白鵲白鸛鵠表

代宰相謝賜布帛表

嘉會節宰相謝酒食表

代宰相謝降朱書御札表

代史館王相公謝令樞密使宣諭奸邪表

爲西川崔僕射謝卻赴劍南表

代戶部孫相公謝授兄太常卿表

爲宰相謝內宴表

爲兩省官謝內宴表

代兵部崔相公謝追贈三代表

代兵部崔相公謝追贈三代表

爲皇甫懷州讓官表

爲集賢崔相公讓大學士表

第二表

第三表

欽定全唐文卷八百三十五

錢珣五

代集賢崔相公謝賜官誥表

臣某言伏奉聖慈賜臣某階某官食邑若干戶官誥一通者臣某中謝臣伏以周官所建冢宰是先進階陞之名增井賦以數重在彝典合爲渥恩冒寵以來偷安而處不能退讓方懼滿盈詎謂陛下每顧舊章必加優禮雅誥旣垂於綸綍侍臣忽降於宮闈五彩相鮮且成文於潤飾萬鈞比重幾無力以捧持聚族咸觀省躬何稱遭遇莫酬於君

金史卷之五十五
父寶藏空戒於子孫竊視權衡惟思砥礪臣某無任感恩
荷聖激切惶越之至

代集賢崔相公謝賜官誥表

臣某言今月某日賜臣某官誥一通者臣某中謝臣敢謂
皇慈仍加霈澤固讓而丹誠莫遂退思而元造寧酬今者
特降近臣遽臨私室琅函乍啟捧持空耀於微躬寶軸載
觀燦爛仍驚於衆目榮光併集舒卷不遑難勝黼黻之文
何補變調之任唯當千慮以荷萬幾見可而進之謀知無
不爲之力用裨至理庶奉休期仰戴聖慈臣某無任省已

感恩之至

代集賢崔相公謝賜官誥表

臣某言臣先蒙恩命授集賢殿大學士今月某日中使至
忽承霈澤降自重霄再披五色之文若戴千鈞之重臣某
中謝伏惟尊號皇帝陛下求衣待旦側席視朝方致理於
雍熙每仰成於輔相臣自慚竊位唯懼曠官未獲避賢何
堪假寵爰驚瑣質更被鴻私提玉鉉於中台已憂公餽總
石渠之祕署兼集羣才當文德之大朝實名儒之大任今
者遽頒雅誥益示皇慈兼命王人且臨私第琅函乍啟光

金匱要略卷之二十三
凝紫府之烟寶軸潛舒潤帶金盤之露空知焜耀無報睿
明臣某無任荷聖感恩兢懼之至

代宰相謝示白野鵲表

臣某等言今月某日高品張師道至奉宣聖旨示臣等涇
州所進白野鵲者臣聞白爲正色鵲實靈禽在五行而賦
稟金精於衆鳥而有殊羽族臣某中謝伏惟尊號皇帝陛下
下應上天之道必順五行遂萬物之情非徒衆鳥宜獲降
祥之類以昭致理之心是以素翼流光丹眸耀衆俄呈瑞
質能弄好音應圖牒以自來詎網羅之所得諸侯入獻史

氏明書寧同集樹之烏堪並紀年之雀方開景運實契禎符臣某等謬贊皇猷竊觀神貺無任賀聖歡忭之至

代宰相宣示白鵲白鸛鵠表

臣某等言今月某日高品張徒羽至奉宣聖旨示臣某物者至化無私殊祥畢萃既光史策允叶元符臣某中謝伏以西方主白金氣應秋故靈禽頻見於塞垣元貺實昭於人事遂使載飛之類皆呈受采之姿以物窺天知天感聖犬戎柔服必無犯於西方禾黍豐登將有成於金象假茲毛羽降彼藩隅既來獻於帝居獲同觀於公府何能翼戴

徒荷休明臣等無任舞詠聳抃之至

代宰相謝賜布帛表

臣某言今月某日中使某至奉宣聖旨賜臣布一千疋絹
二千疋者臣某誠哀誠感頓首頓首臣災集衰門禍貽諸
父執禮既循於經典成喪將服於冠裳何言臣子之情必
軫君親之念近效承命飛星忽降於重霄寵數有章束帛
載頒於內府哀榮曲被跪受難勝上感聖慈臣無任涕泣
惶越之至

嘉會節宰相謝酒食表

右伏以香火至誠祝後天於萬歲弦匏飾喜會率土於三
春敢望宸衷恩隆輔弼王人遞降寵錫爰加酒醕繼陳炮
燔兼至名茶馥郁嘉果駢羅嘗珍而食指先驚敢忘盈滿
竊位而憂心已醉寧待獻酬仰望睿慈臣某等無任兢感
懼忭屏營之至

代宰相謝降朱書御札表

臣某言今月某日中使某至奉宣聖旨頒示御札以貶黜
張道古事更令申誥中外者聖旨昭垂羣情胥悅臣某中
謝臣伏念元和中吏部侍郎韓愈因陳佛骨遂拜封章以

爲前古奉佛帝王年代猶促憲宗以人臣去就乖忤非輕
震怒所臨遂竄荒裔憲宗英主韓愈名臣典記可行事無
不順今張道古狂瞽所獻斥犯非常凡曰在庭皆知難恕
深宏睿哲且欲含容雖匿瑕之道則然於犯上之名斯重
臣等請行譴逐陛下尚顧物情宸翰所臨皇言曲被盡賀
爲君之盛咸知六德之能捧戴聖慈如親丹宸臣某等無
任銘篆兢越榮感之至

代史館王相公謝令樞密使宣諭奸邪表

臣某等言臣嘗讀漢史竊見上官桀桑宏羊皆惡霍光之

忠於王室也欲奪其權遂詐爲燕王上書言光將有非常之變而昭帝知其詭詐欲害賢良顯發怒言保明元輔職者以爲漢昭之聰睿遠過周成臣等每閱其書實感其事以爲後代不復有之今月某日獲延英奏事親奉聖言且以陛下深懼艱屯欲清教化寤亂階於前事窮蠹本於小人旣已誅鋤方期屏絕而常有技術賤微之輩班行險躁之徒潛結詭謀輒投邪隙且相援引遂有譖傷間謀滋深根株甚鉅而聖心不動睿鑒有融盡辨讒諛靡容交亂致臣於不疑之地知彼有禍人之心且赫揚於斯必令懲革

覲於左右永杜奸邪臣等且懼且驚載思載感還至公府
未知所安樞密使某等又至中書備傳睿旨伏知是李遂
劉達等共謀推薦李潔秉政因此大惑天聽君臣之所難
聞乾坤之所共棄有李遂之奏肆志巧言而陛下不以爲
疑祇以爲怒凡所布諭必盡洪纖某等復宣陛下之言不
惟保任臣等兼欲擊斷此輩彰明我心臣等稟命而思激
情以泣自有邦國誰無君臣今此讒邪忍施陷穽密構於
一夫之口何術可知潛行於萬乘之前何人敢辨雖陛下
察之不惑隱之不言有此釁端加於輔相臣之寤寐將至

驚狂一旦親奉堯言俾行漢律使罪人斯得餘纔自安復使微臣必無他慮食馱馱者未足爲德喻媒孽者未足爲辭李遂輩擠臣於不測之谿陛下賜臣以援溺之手誣臣以難明之罪陛下諭臣以必信之言彼昭帝之時漢家方盛霍光之辨且有詐書今李遂得於艱苦之朝進傾危之說宸聰之外孰可得聞則臣等塗汙一浸江漢難濯歿爲野土誰爲叫闔不有睿明焉知昭釋感入骨髓誓諸神祇千拜首以何爲一剖心而始足惟當竭誠啟沃戮力弼諧盡毀家紓難之謀繼圖國忘身之策尚疑丹悃未答皇私

荷聖感恩臣等無任抃蹈兢慄涕泣屏營之至

爲西川崔僕射謝卻赴劍南表

臣某言自中使馬承倩送臣卻至所部漢川迴監軍中使孟遊仙等續發北面拜天南旋舊鎮望九門而彌遠顧三蜀而何情如丹之心具列前表庶明臣子之分以期君父之知臣某中謝臣四度興師每冬獻捷願將邊事親達宸聰比恐三軍阻臣行計潛裝密辦亦旣經年上都贏糧傍路支費事皆前定誓衆遂行日望京闕天威咫尺豈知時乖運末屬彼外虞徵發之期指蹤又切進退難處彷徨以

還有心未明有口猶閉若捷之恥空思於堯舜戀主之誠
倍慙於犬馬臣知從事官王忻傳遙自經驅使積有歲時
言行惟一爲臣腹心當今切務具如別狀悉令密啟遠達
由衷伏乞聖慈俯迴神鑒仍賜容納許以畢辭天下幸甚
天下幸甚其有不載文墨更令附口奏聞皆是刳心所陳
豈爲億中之說倘可裨補雖死猶生區區赤實敢希萬一
臣以今月某日卻至成都訖整齊戎事即赴行營西藩動
靜續冀奏聞衆星微象長拱北辰勺水細流盡朝東海惟
臣不及飲恨何言無任感戀屏營之至謹奉表陳謝以聞

代戶部孫相公謝授兄太常卿表

臣某言伏奉今月某日勅命授臣親兄太常卿檢校右僕射者霈澤下臨私室相慶臣某誠歡誠荷頓首頓首臣兄某抱公藏器據德有隣爲善而不欲近名從政而但思利物自臣遽升台輔獲導化源雖向國去私戒臣常切而入門避事遠謗每深出趨垂拱之朝退務掩關之樂陛下禮行舟楫念及墳簏慰其友愛之懷進以優崇之秩伏以九卿之位歷代所尊舜以三禮命伯夷漢以奉常加稷嗣倚古則重得人始光用典之難敢言兄氏方懷慚惕忽荷皇

私而階峻銀青寵兼端揆喜溢在原之屬恩加當軸之臣
旣激弼諧且宏名教股肱作輔莫成鎮撫之功手足相須
但有胼胝之誓臣無任愧竦之至

爲宰相謝內宴表

臣某言臣聞古之王道美在詩人爰徵式宴之名則有鹿
鳴之什俎豆旣列筐篚亦陳羣臣享而受之得使盡其心
也能追古道實在哲王臣某中謝伏惟尊號皇帝陛下聖
文有作臨照克明昨者以告見祖宗率兩宮而偕行重典
祈禱天地感百神而已報豐年方屬清和更宏慈惠遂當

暇日乃闢廣場旣接輔臣兼延卿士我心則悅洞開咫尺
之顏不醉無歸畢降獻酬之禮而又深形睿旨新製樂章
但臣等忠則有思拙而無補陛下勉其翼戴播在弦歌竊
聽鏗鏘空知慚感爲恩如此何力可勝徒以宮殿飾同疑

文符混一舞成奇字更俟太平待季子之請觀笑吳宮之
教戰盡如解慍詎異聞韶況凡有嘉邇親令下飭臣細之
事指顧不違鴻私曲被於茲辰寵遇頗踰於往列仍蒙賜
賚且極纖華伏自侍宴已來還家自省變理欲酬於元造
終乏嘉謨傳聞空徧於遠方彌光聖德君臣共樂史冊可

書臣某等無任銜恩涕感歡榮忭躍之至

爲兩省官謝內宴表

臣某等言臣聞謂傾心於百辟向日雖同觀拱極於衆星在天各遠所以會朝之地每隔丹墀而燕私之嘉忽親黼宸注渥恩而則可求故實以未聞事出常倫感深庶位臣某等伏以考擊鍾鼓鋪陳几席恭惟列聖常命周行且屬宴安仍須物用匪勞規畫始就歡娛今陛下以尚念多難不爲自逸外闕貢輸之數內無饒羨之資蓋以臨昧旦而謁宗祧彝章必具仰昊天而祈稼穡甘澤已頻方當行慶

之時且欲與人同樂昨者昭垂睿睞俯接羣僚忘憂而飲
備六清旣飽而羞踰百品戒膳夫之失飪詔酒正以如澠
賜者鮮闕行之皆徧飾喜則聲從禹律製曲則音自堯聰
樂和而鳳鳥應來舞妙而薰風共轉曲形文字全爲生靈
承天詔以咸觀兼聞金石泛恩波而已醉不待罇罍柏梁
殿唯召詞臣華林園亦非密座共當異寵難並茲辰光東
帶而更勵立朝顧綵繒而彌慚勝質則微臣非徒享滋味
聽鏗鏘而已霑纓感德稽首拜章臣某等無任荷恩激切
榮耀屏營之至謹奉表陳謝以聞

代兵部崔相公謝追贈三代表

臣某言伏奉某月某日制命追贈臣亡曾祖某贈某官亡祖某贈某官亡父某贈某官伏以恩深逝水澤及重泉哀極失圖感惟增懼伏念先臣實逢聖代寵被乘軒之數名傳汗簡之書而隙駟難畱隴樹斯拱積感既深於霜露叨榮復忝於陶甄陛下重顧台臣爰加贈典陰陽未序寧施報國之功霈澤遽臨空激承家之志仰惟追命唯自省躬臣某無任荷聖感恩哀榮懼懼屏營之至

代兵部崔相公謝追贈三代表

臣某言伏奉今月某日制書追封臣亡曾祖母亡祖母亡母某國夫人者典常重舉渥澤下流臣某中謝伏以尊號皇帝陛下動法天經用宏王道繼降追榮之命若酬輔政之功竊念微臣謬持魁柄計日月則四時未半調陰陽則六氣未和而聖造曲臨彝章俯及上公端揆已承褒飾之恩大國贈封更荷顯揚之賜康化權而無力顧家牒而有光祇戴睿慈臣某無任哀感激懼屏營之至

爲皇甫懷州讓官表

臣某言伏奉今月一日制書除臣使持節懷州諸軍事守

懷州刺史成命俯臨兢魂自失妨賢不退無德而升恩屢
錫而知慙祿彌高而愈懼中謝臣聞國經選士有一善而
不集作遺天爵與能從九徵而可試臣薄遊憲府累踐禮

闡衣繡無執簡之才起草愧含香之列移官望苑日月其

除驂駕梁園涓埃莫效剖符南峴旣恧民謠作鎮西河未

寬人隱二一作三邦爲政撫熊軾而無功八使迴軒同鶴鳴

而有薦遂乃謬霑東帛猥賜褒揚頓掩前瑕更延今寵山

陽大郡河內名區桑竹蔭淇水之西井田雜邨山之北將

何以潤通京邑化接神州雖勉三載之勤何補一年之借

封畿之要厯選稱難臣也胡顏敢膺斯寄伏乞再求遺玉
更網潛珠庶使賢才申共理之心聖主得分憂之地無任
叨竊之至謹詣朝堂奉表陳讓以聞臣所讓人別狀封進

爲集賢崔相公讓大學士表

臣某言臣昨奉恩命加臣某官者非常之澤稟命實難今
月某日已奉表讓訖伏慮聖慈所注宸旨未迴累足屏躬
自逃無地遂敢再傾肝膈仰告睿明臣雖至愚非敢飾讓
一則副陛下用臣之公道保陛下知臣之遠圖一則惜朝
廷之典章重朝廷之爵秩永惟矜鑒在我聰明伏以顯賞

之恩殊勲是稱凡施君命必合國章昨者逆將興妖稱兵
搆變災匪同於天作患實過於主憂咎在輔臣理當昭憲
但臣久罹強劫莫扈出居走間道以獲歸乃王靈之所被
免致陷身之禍得陳拜首之容伏蒙陛下特閔驚危盡寬
罪戾收雷不振就日復安尚處弼諧空知慙感至於遽停
輦輅近駐郊圻廟貌不遙園陵可望是陛下孝通祖考所
以不遠京師也又能庇茅茨祇臨草莽潛施英畧使殄逆
徒坐待梟夷風行號令然後決乘輿之反正慰父老之怨
思謀夫自多睿志先定自陛下精感社稷所以不移節序

重啟昌期咸資聖斷臣將何力可助元功比者殊渥遽臨
莫知所以爲賞之僭懼及淫人春秋正言國家大事聖朝
行之則有損微臣受之則無名且臣叨荷休明貴爲宰物
兢兢守道尚懼憊尤汲汲經邦未能報効今伐叛之地實
非近藩虜馬方飲於渭川戎帳頗施於秦甸農商半收疑
貢賦鮮通中外未安宵旰多慮凡垂恩澤先布瘡痍次及
勲功方爲闕十字元和聖武乃顧淮西宰臣裴度總統全師

削平宿寇勤勞忠烈史策昭煥獻捷還都書勲行賞持衡
之地但加金紫之階詎是憲皇之恩澤不深裴度之勲名

不盛此乃愛重彝憲保持大臣遂令賞薄於功欲使衆稱其美列祖遺法陛下聿修在臣感恩欲增聖德中書故事常欲兼官雖當敘進之間亦在歲時稍久錫之有度拜者則安臣又非宜朝將何論真食之命令典俱存求而論之斯事非細軍儲方困公聚正虛郡國凋殘乃陛下殷憂之本臣僚艱窘是陛下軫卹之秋而宰臣獨以膏腴贍其封邑人情頗惑事理不通承命以來連宵審度粗能祇荷皆欲寵光何敢進犯天顏尚煩俯察誠憂赫怒其可苟安不言則負任使之恩有讓則違獎錫之旨有違無負明主必

容情激辭多憂緣寵過伏乞特迴沛澤且使燮調息致寇之危疑合興邦之理道臣某無任死請迫切懇悃之至

第二表

臣某言臣昨蒙聖恩加臣某官實封等瀝誠雖切天鑒未迴今月某日又奉宣命賜臣持危匡國致理功臣者寵光踰溢俯俸驚惶昨已奉表陳讓訖恩出一時事非常典衆方興論內不自容是以伏紙寫心累干睿鑒未蒙俞允匪獨驚危朝省夕思且涕且激臣腐材弱質叨列公台何施尊主之能未立爲臣之節而艱難之後陛下待遇愈優食

必分甘言皆動色宏慈厚禮前代所無比及今茲適當反正斷自不疑之旨遠行非次之恩則臣竊驚孤心兼量愚分仰酬萬一且合如何至使堅讓未休蓋亦深知不可上惟聖德恐有失中受詔之難血誠在此陛下以歸復之慶謂臣有參贊之功嘉謀旣出於元機勝畧必資於英決恭惟茂實前已備論上聖推不宰之心而具臣乏可書之績則甄賞之命遵行及私唯增鄉校之言兼致匈奴之笑否臧是驗損益可知況臣在中書又殊同列彥若與博執政在臣之先或累歲變和或踰年鎮撫弼違斯切成效固彰

臣自再忝秉鈞初當變律未調鼎餗徒辱車茵遂罹向闕之兵莫救燎原之火至於今日無補大朝寵獎重恩俯躬非稱伏以奠食之命雖著舊章蓋上將平戎大勲卓立超酬特賞始可勝任行於文臣此事固少況在今日不並往時天下編氓殆無膏血筋力盡疲於戰伐經營多廢於耕桑所在聚兵肆爲厚斂不免者痛侵剝剝可免者患至流亡鄉弊家殘不勝條說寧於此際更可重傷兼計百戶之封歲當五百餘萬軍儲常廢國用急須以此校之所濟非少今陛下焦勞睿算臣等涸竭智謀蓋爲朝廷日憂匱乏

曷若迴非宜之恩命救急務於公家聖慮旣寬臣心自泰
生人不加於怨苦經費自濟於艱危宏陛下爲國之資伸
微臣代天之極幸以是竊度實敢固違加臣之名本加疑
武將伏自先帝興復之後宰臣特授殊恩且類權宜何光
定制況臣執政爲日未多安可輒冒憲章當此多數伏自
陛下光承丕構實耀英謀如秦權黃鑄之克徒及近歲甫
誅之大寇載揚我武克致明刑此外凡有克渠未嘗漏網
聖功神畧可謂赫然去年公卿等合彼兆庶之心遂有鴻
名之請封章四上伏奏累陳陛下以時未戢兵人多言病

不循令典不顧羣情久執至謙畢奪衆懇作聖有歸於公

望上言敢犯於聖明夫元首股肱

闕二十二字

陛下讓懿號於

去年臣則受鉅名於今日

闕六字

不同一體之榮與之則臣

蒙姑息之愛矧於事實未合便宜近者國之名器多假諸

侯法度久踰改張何暇宰臣謹畏再務率先尚慮驕矜不

能儆戒陛下若於朝廷未安之際藩方難制之時忽使輔

臣併加殊事則勲侯戎帥越例貪求中書自思無以奏奪

空煩聖慮益壞政經是因今日之恩復作他時之患諒非

細故得不極言累陳切讓之辭庶獲洞開之鑒上祈聖哲

備識愚衷寵渥未收憂心如灼生惟富貴誰無崇盛之謀
禍在滿盈臣有顛危之懼方承任使必覲哀矜伏乞聖慈
速降明詔允許臣某無任瀝血輸懷祈恩俟命激切惴惴
之至謹奉表陳讓以聞

第三表

臣某言臣叨膺殊渥特越常倫一縷千鈞非能比重累棊
加卵何足爲危是以繼獻封章面陳肝血宸衷益注寵數
不移未允愚私如中狂疾伏以皇帝陛下恢張天覆優遇
宰衡流澤而唯恐不深錫爵而唯恐不重欲行君德更邁

金史卷之三十三
古皇茂典畢申睿慈未足內惟感激旁有神明則臣報効之端合識安危之道臣昨者辭讓繼具鋪陳不敢更俟煩文上干聖覽但以陛下大崇儒術多悅羣書經誥之間講論尤切察臣子去就之分考生人禍福之源固以精辯臧否臧盡詳炯戒今臣之懇激尚敢披陳夫貴而知懼者春秋所書祿不期侈者尚書之訓苟忘斯論何以全身況臣之生年歲當丙子四十強仕血氣方剛求之族類之間初在簪裾之列而臣亨逢廣運夙忝重官爰自前年已居台輔至於今日復列鼎司享於極位之中處在羣寮之上潛憂

弔者已在臣門凡有寵光每宜畏避則官無厚謗天祐微躬上可以永保陛下之恩次可以善守先臣之嗣是非之際物理甚明如或終自昏迷仍貪寵利害盈之罰更在何人太盛之災不到他日今陛下以崇名重器豐祿殊榮併壓臣身必速天咎倘此期未至尚或苟容而焚灼常苦於寸心芒刺日加於四體精神紛擾疾疹交侵便至乞骸何能充位雖臣欲陳綿力粗補萬機更策懦才或康庶政固無門於立效徒抱恨以自尤且臣在同列之間擢用最近等衰之制輕重有宜今臣所蒙制命授集賢殿大學士序

遷葬典寵飾新恩難有固違謹當祇受其功臣名號官階
爵賞實封等深思僭溢必致遭災敢徼飾讓之名願擇常
存之福且將勤勵獲佐盛時直露情私寧欺君父伏乞聖
慈終賜矜允臣某無任迫切泣請恐悸之至

欽定全唐文卷八百三十六目錄

新文藝出版社藏書

錢珣 六

代史館相公讓官第一表

第二表

第三表

第四表

第五表

第六表

爲王相公讓加司空表

爲徐相公讓加食邑表

爲中書崔相公讓官第二表

第三表

第四表

第五表

第六表

代史館王相公讓相位第一表

第二表

論內臣朝服狀

再論內臣朝服狀

舟中錄序

杜曉

匡國節度使馮行襲德政碑

欽定全唐文卷八百三十六

錢珣六

代史館相公讓官第一表

臣某言伏奉今月十三日制命授臣某階某官仍加食邑一千戶今日獲於延英親承聖造慙懇陳讓未賜允從臣某誠感誠憂頓首頓首臣聞衽席之上讓而坐人猶犯齒朝廷之位讓而就賤人猶犯貴人情之間讓猶如此況其不讓無犯則難而復台輔至崇鈞軸至重頃年陛下擢臣秉政莫獲固辭已乖戾於當時敢因循於今日伏惟尊

號皇帝陛下於君臣之際今古所希有善必知有過必掩使之夾輔恐不光昭故重器崇名焜耀而常思假寵進言論道周旋而盡鑒推誠上感天心臣非木偶今之讓爵蓋懼生災猶慮天下之人將有所犯敢於翰墨畧布肺肝且陛下示以殊恩增其貴秩當庶事苟同未稱在衆心必以爲非旒宸寓臨宗祏權設有兵革未能載戢有法制未盡公行凡此憂虞不遑寤寐以茲受命可謂稱乎聖澤纔流謗言未至縱朝行爲臣籍結顧寰海必自沸騰則上有私於輔佐之間而臣闕啟災咎之本繇是終始揣度進退驚

疑以此拜章實期得請陛下加臣以渥澤不若使臣合物情寵臣以光華不若遣臣免災咎儻人言不息天咎必來焉得自隱自欺不披露懇悃伏惟洞開睿鑒俯徇愚衷且遣粗安更容陳力廣至明之德罷已降之書昭示四方用新聖政臣某無任感激惶懼屏營之至

第二表

臣某言伏奉今月某日批詔具承聖旨臣昨者固辭寵休有異常等然始以謙讓爲說終以災咎自陳未能便動天心上迴睿渥復傾肝血進拜封章直舉其言冀蒙昭允臣

某誠迫誠懼伏惟陛下寬明有制聰哲成文揚憲祖宣祖之風冀元和大中之運故欲治而尚亂欲泰而未安潛測聖懷常縈百慮臣爲宰輔得不周知且自去秋以來國步未復臣每思人事每揣人情內激肺腸有如湯火陛下當食不美當寐不甘欲以攻苦食淡之心抱公滅私之道致陛下之理釋陛下之憂然而再秉機權未能致此者蓋臣去已之事尚有因循防患之謀率多容易若臣去已必決防患必專天下之憂庶幾稍解而祿位輕授之弊近歲愈深上自侯王下至卒伍受爵賞者所承不重荷恩澤者所

感不深蓋緣族類之間踰謬者衆不重則無以勸其戮力
不深則何以激其盡心因之且不稟朝廷不畏法度不稟
必亂不畏必危本末之間實出於此今臣貴爲四輔重有
萬機階秩就加朝廷常典又何必齷齪謙讓而違君命也
但欲審度去就明辯否臧以臣去已決烈之心拒天下越
等干求之患使爵賞不濫與恩澤不妄加則承之者必重
感之者必深如此自凜朝廷自畏法度有患可弭有難可
平此事非所難爲祇在陛下明察儻或信其誠請遂寢新
恩則君臣之志氣大同理道之根源必正若陛下不顧其

說在臣亦欲何爲但抱憂惶難居夾輔有渝斯語是謂明欺君道始終聖情深淺祇期遂志不敢匿情再黷冕旒若臨泉谷臣某無任迫切惶恐俟命允許之至

第三表

臣某言臣昨者再獻封章實披肝膽而詔書批諭德澤滋深有志未從有言未納雖屬沍寒之候不勝流汗之憂臣某誠慙誠惕臣聞帝王以國事之重倚於輔相者旣觀舉直之誠必責理平之效故責之必信信之必終然則厯覽古今此乃明君遇賢臣之事今陛下明德非臣獨知臣之

非賢人共知耳而待罪之位非次久居陛下知臣之心處
臣之地每陞便殿常認聖慈謂臣輸寫甚忠舉措多直每
參大政皆聽淺謀有間之言無從而入至如一昨忽構羣
邪奏密而左右不知禍鉅而本根已固雖傾陷盡闕一作關
於大事而譖傷先在於微臣陛下知臣素無他腸知彼但
肆讒口聰明一寤擊斷不疑否則臣永抱幽冤已當誅殛
棄逐奸臣之日忽降渥恩蓋欲使中外之人明知遇臣益
厚以茲銜謝詎並尋常則臣自此事君自此執政每圖報
効且合何如所以固讓重恩深申血懇昨者所陳章表始

末以去已爲言蓋欲以人情所難爲臣願爲之於今日陛下所賜之異寵臣願卻之於此時將使萬邦盡驚致理因茲約束冀漸和平若臣冒寵不辭何術可制天下至大至切不得不然今陛下未察愚衷頻加聖澤與向來知臣之旨昨者保臣之心顯有不同臣將何託前所謂齷齪謙讓臣實不爲伏望陛下以所奏之書靜賜睿覽察其陳讓之懇匪以沽激爲名利於國家不避震怒倘陛下將期復國別欲任賢奪臣迫切之心以示棄絕之旨則當避賢而退不敢更煩聖聰竊期此言得遂堅請臣某無任拜首瞻天

漉血隕涕懇激徬徨之至

第四表

臣某言今月十八日延英敷奏親獲固讓官榮徒荷皇私未從丹悃今日又開芝檢復聞綸言莫聽鋪陳尚令祇受臣某誠懼誠迫臣聞高下相遠者天地也而天地之氣必通所以四時周旋萬物生育尊卑相懸者君臣也而君臣之道必合所以統理諸華肅齊庶政天地不通則萬物天君臣不合則庶政乖今臣讓爵推誠極言防患拜章累日答詔三臨聖鑒未迴愚衷無感恥君道之難合懼庶政之

特乖內負沉憂若罹昭憲是以泣邀神助往覺魂飛伏念此心匪緣他事推誠爲國防患爲君恭惟睿慈寧忍不察且朝廷之勢不强於藩方輔相之權見侵於將帥隳毀我法制殘虐我生靈臣常結憤於胸中陛下亦興難於南面固欲乘機革弊因事抑强二者之能不假奇術但所行必正所作無私祇於賞罰之間必與物情相順陛下申命宰臣奉之聳聵皆披頑嚚可化而將帥見侵之患日息則朝廷不强之勢日興罔害政理之大經罔累聖明之全德將使國平時泰不慮不憂陛下若棄此不從是怠於中興之

志矣臣之痛惜如割肌膚心腹腎腸傾寫罄竭臣血可嘔
臣軀可糜已決之心則不可奪臣某叩頭屈膝無任涕流
泣血精爽隕越之至

第五表

臣某言臣今月某日延英面獲陳讓後復拜封章詔諭又
臨懇激未遂臣某誠兢誠慄頓首頓首臣聞琴瑟有不調
者尚或改而張之辨士之言良史必記朝廷命官之典故
大於琴瑟之絃公輔求理之謀亦重於辨士之說況所命
者宰相崇高之秩所謀者邦國臨制之機而臣等堅辭必

防他患陛下固奪將啟後艱他患若生後艱何救且臣伏思陸贄以忠信事德宗皇帝建中初方爲侍從之臣事繫安危言皆激切有不納者必能力爭當彼寇難之時德宗欲加尊號訪於陸贄遂獻忠言以爲大憝猶存中區多梗是天意去就之際人情向背之秋若使重益美名必累中興之業德宗英寤遂納忠言當時轉禍之期實若走丸之速然則以近臣直道奪聖主鴻名有犯之言莫甚於此今臣讓官辭爵與彼輕重不同而於危難之中陳匡救之力愛君爲國心則無殊昔者德宗再閱披陳具明損益今臣

卷五

命之至

第六表

臣某言同心同德是爲亂臣五獻封章繼陳懇悃復升便殿累貢切言天高而曾不少聞日近而未嘗俯照臣某誠憂誠迫頓首頓首臣聞詩云受爵不讓至於已斯亡仲尼刪詩此言不去則古之爲君者非憎其臣而欲以爵亡之也蓋勸忠勞昭典冊無以加於爵位也古之爲臣者非惡其爵而欲讓之也蓋定是非畏盈滿無以加於謙讓也得受爵之宜無不存也失讓爵之宜無不亡也古人所謂亡

者彼亦不過其身既而有益於君亡亦可也苟或亡身敗國無益於君致亂階於一時流惡名於千載今臣之不讓是長亂階且陛下觀天下之事理乎觀宰臣之心忠乎若天下已理宰臣不忠陛下迫以爵位致其危亡臣則瞑目而歸何害於國若天下未理宰臣則忠陛下不聽苦言須加重爵臣則碎首而退何利於國臣之不畏其亡但當未理之時不可更長亂階也所謂未理則非聖德有所不能蓋天下承弊日深諸侯不順其理故臣欲以今日之讓制天下承弊之風而正其不順也不革承弊不正不順而望

萬人再安四方無事者是抱薪救火其可撲滅乎言出臣口事痛臣心假使嚴旨復臨臣則終讓而已奚自拜疏卻類叩闕臣某無任流涕哽切進退屏營之至

爲王相公讓加司空表

臣某言伏奉今月某日恩制特授某官者三公之選八命而居前古以來無人則闕仍開大國兼進崇階言渥恩則深若紫泉顧名器則重俾泰嶽揣分非次恐慙難安臣某誠惶誠恐頓首頓首臣忝列公台忽踰半紀事乖允當識昧便宜何施作相之材但累知臣之道頃因出狩自合乞

骸未臨復國之期敢有逃天之意而君能得一日且再中空知陪扈之勞獲覩清夷之慶伏自去歲至於今春每懷失職之憂繼慙避賢之懇愚衷無感睿鑒莫迴徒齷齪以受譏但因循而竊位何言霈澤又降重霄實慙夢賚之人安稱坐論之地捫心自省沾背不遑雖陛下修道側身發言罪已可卜運興之兆將承天賜之休然則劍戟未銷江關或阻猶煩聖慮且乏嘉謀敢於此時輒荷極寵上祈元造俯信赤心行之則明主有私罷之則微臣無咎推諸至理是以固辭蓋欲保全實非飾詐冀蒙矜鑒特賜允從冒

黷冕旒臣無任兢感戰越之至

爲徐相公讓加食邑表

臣某言伏奉今月某日恩制加臣食邑一千戶實封一百戶臣某伏惟尊號皇帝陛下文武應天憂勤厚國旁求翊贊慎擇能賢如臣之才焉可執政徒以其濫承台蔭擢處鼎司屢改流年多隳獎憲莫獲乞骸之便空懷沾背之羞頃屬陛下尚駐乘輿且臨關輔都人久散廟貌未嚴顧居守之重難注宸衷而任使聖言親降霈澤遽行拜官仍忝於緇衣備位不離於黃閣寵靈則固兢慄載深蓋以忤違

天顏初達帝里雖南山渭水變王氣以潛新而荒草壞垣
動秋風而尚慘連薨何有編戶猶稀臣當此時莫知所措
實賴祖宗垂祐睿哲申謀兼委近藩旁分庶事免微臣之
獲戾濟重務以有成遂致五輅鳴鑾六師被甲陳吉行之
盛禮正法座於良辰誕告四方復興景運御日月而無違
素志嚮邱園而已動歸心遽謂聖慈忽加元造尚責佐王
之効重增開國之封仍容素餐兼賜奠食祇承異數徒冒
優恩已虞招損之譏敢竊好謙之美況佳兵未息公聚多
虛詎宜特命輔臣更加井賦事非允當言必喧傳伏惟曲

鑒愚誠更迴厚渥冀絕謗論且顯聰明臣某無任荷聖感恩
恩瀝懇待命激切屏營之至

爲中書崔相公讓官第二表

臣某言今月某日伏奉批詔以臣陳讓寵光未賜允許揣
分而省躬知懼感恩而鏤骨徒深臣某誠憂誠激頓首頓
首伏念臣之事君也輸忠竭力以從政君之使臣也增爵
進秩以報勞勞旣未申寵至必讓凡於庶事皆在適時當
其時不得不行非其時不得不止今臣承命可謂非時且
思加獻鴻名是爲常典而去歲之首羣臣數四拜章願增

神武之名用稱欽明之德而陛下永惟大體堅奪衆心蓋以反正之初艱難未濟仰惟睿旨非獨謙光欲廣嘉猷深知不可陛下之志既定臣子安敢復言亦以非時罷茲盛典今臣之愚懇竊合聖謦去春方在京師尚隳此事比者猶當巡幸固不可爲內度宸衷必開宏鑒遂敢再披肝膽實期便輟渥恩請候鑾輅歸還干戈弭息卻施綸綍俾合憲章今日皇私則難濫受可行可止事理甚明伏冀睿慈便收濡澤再冒旒宸臣某無任兢悸迫切之至

第三表

臣某言臣昨以寵光踰濫循省兢憂兼懼用典非時有累日新之德再傾肝血實冀允從而天鑒未開愚誠愈迫臣某誠惶誠激頓首頓首伏以陛下濬哲自天憂勤爲國感屯蒙之未泰先昧爽以有臨臣每奉清光備承睿旨無言不盡無理不思決去邪懲惡之謀若反掌轉圜之速況察忠仗信據理任材誣譖者徒欲橫侵傾危者皆令立定茲所謂疏通知遠淵靜有謀闢四門明四目者也臣不知昔之令主何以加於陛下之道乎然睿哲憂勤昭彰如此今宰臣以非時之命有所堅辭蓋欲朝廷行事得宜天下物

情共洽則臣可以制天下非宜之請廣朝廷致理之端用
贊中興以新庶政詎獨務爲飾讓而進犯宸嚴且睿哲則
何嚮不通憂勤則何思不至旣通旣至必察必知臣之所
陳實欲利國神明所聽毫髮敢欺況有常情亦難自匿臣
雖乏出羣之智纔踰強仕之年幸偶文明方圖富貴苟或
拜恩可稱荷祿不慙則何必固小節以鳴謙干大君而違
命跪承批詔退揣事機讓之則所益必多受之則所損非
細仍念王搏崔允以懇激拜章并臣披露之辭畧盡否臧
之說雖煩聖覽當察羣心得遂有改張遽收渥澤斯爲

從善實可經邦且凡受寵休有所退避或名聲不稱或遭遇非才小則恥識者談笑之端大則憂賢人譏責之罪今臣於談笑譏責亦不敢以君恩避之實欲制天下之非宜廣朝廷之致理用光興復永濟艱難仰望聖慈臣某無任寤寐齋禱激切之至

第四表

臣某言伏奉今月某日批詔以臣堅讓寵章未賜允許者憂誠若焚駭汗如雨發於肝膈鑒在神祇臣某誠恐誠迫頓首頓首臣聞以欲從人則可以人從欲鮮濟此蓋左邱

明之信史臧文仲之至言陛下多閱正經以資明德固於
深旨靡不盡知然而陛下優遇台臣恢張天覆賜爵而唯
恐不重流澤而唯恐不深茂典畢申睿慈未足此蓋陛下
以無私之欲勸有位之臣使其更竭謀猷以濟難否是陛
下之欲也臣匪不知臣所以斯須不寧數固而讓者蓋緣
陛下在省方之地有國未歸微臣忝執政之權遇昧未泰
謂爲輔弼實抱憂慙刻苦厲精進賢讓寵所期天下之士
且不加罪於臣旣安其心庶竭其力此臣之欲也陛下之
欲不過勉勞臣等三人納善罷之小無所損微臣之欲使

昭示天下之人聽而俞之大有利利在邦國皎然可知
陛下若以欲從臣理無不可若以臣從欲鮮濟不疑雖又
新奉聖慈未容陳讓在臣丹赤誓不稟遵其於利害之言
辯折將盡實以多爲緣飾亦不敢再黷英明進思之心死
請而已臣某無任懇激兢越之至

第五表

臣某言臣事君未盡舉職無聞瀝血懇而黻纁不聽降皇
使而紫泥適至臣某誠惶誠懼頓首頓首臣聞啟乃心沃
朕心哲王所以倚輔相而成理道也然則觀便宜陳訐謨

務匡救而申諫諍不可必奪可者必行竭力盡忠是爲啟
沃苟無啟沃何用弼諧伏以陛下自周歲以來出居未復
南嚮而坐聖慮日深思頃來及霽之言還天下投荒之士
潛心有感逆耳多容今大駕方欲還京宰臣非時進秩上
虧聖政旁啟貪謀宇內幸門因茲大啟竊念久隳法制何
堪更自破除倘陛下固行寵光乃是姑息之旨信任則疎
四海得以酌量萬事更當奸弊且臣罔受爵祿唯惜政經
盡理極辭未蒙聖鑒則是陛下棄啟沃而任獨見絕諫諍
而惡正言自此朝廷卻成壅蔽凡關得失凡有是非徒欲

抗論必無允納則不知天下之事自此如何近歲宰執加
恩不過再陳謙讓至於今日莫並前時朝省夕思可畏可
懼蓋三年之內六馬再奔若使理道昭彰奸克凜畏何由
致此安得不憂聖聽雖煩朝綱必振良圖甚大至化期明
若以干犯未休震怒不捨即臣直視鼎鑊如對軒裳蓋有
氣經邦有心事主死而無悔言實可悲唯恐但畱名聲不
足弭其憂患更無多語祇欲長號臣某無任披膽瀝肝請
罪之至

第六表

臣某言某五奉批詔尚未允臣所讓官階爵邑者伏以將相大臣凡被恩命有所辭讓不過再三安則稟而受之不安者亦許其讓今臣已倍再三之數情固有所不安聖鑒未開憂心如醉臣某誠恐誠迫頓首頓首臣聞杜恕魏之名臣也常以立心行事若非明達君子見諒本心不然則刳心示人與臣何異臣雖不佞常歎其言知信人難古昔如是然杜恕於族類之內尚興此言今臣幸以遭逢重爲宰執雖論才較智莫稱陶鈞而秉直輸忠敢欺辰象拜章之請擇利經邦況奉天顏盡披血懇誓然

疑作言

莫信死請

莫從則臣刳心於丹宸之前陛下亦當未察兢憂慙歎無地可逃今辭理已殫懇激愈甚蓋臣於不安之事終無受寵之期苟或譴怒下臨臣則伏罪而去干犯宸嚴臣某無任隕涕流汗惶越之至

代史館王相公讓相位第一表

臣某言臣聞君人之私在始終而必遂人臣之分於進退以自圖嘗觀古今莫不如此臣謬從先訓本涉儒流傳之者猶有琴書教之者令歸忠孝臣之不佞頗墜所承唯於忠孝之心實畏神明之責策名游宦止望周行偶聖立身

俄塵大任材同常士寵過素期雖欲遠慕前修旁探令典
窺其事業勵此顓蒙副明主之憂勤避衆人之指笑而所
務者生靈富壽每痛彫殘所制者兵革弭寧尚聞侵伐赧
然備位何以事君不唯久合避賢固亦尋宜獲罪偷安四
輔忽已六年假名器而則崇執機權而益拙循省是懼斯
須不遑然臣於六年之中未忍爲一朝之計者蓋以陛下
信其愚直如見肺肝咨以弼諧終無疑間事不幸者必蒙
曲恕心不欺者則荷明知忝異禽魚感深骨髓強陳蹇力
用答聖慈今則曠敗漸多智謀將竭不能引退定至顛危

況陛下光復京師已逾周歲臣之去就亦謂得宜竊見嶺南節度使薛王知柔近有封章懇求替罷是以臣今日敢於便殿直冒宸嚴乞免鈞衡得分節制赤誠盡寫天睠莫迴旣集兢憂彌增激切伏念臣之心力則未甚衰嘗學政經因參戎事尚可遠臨海服具舉化條每推糾率之勤兼濟邦家之用謹廉無犯攻苦不私微臣所能庶幾有效實非飾詐輒罔睿明臆膽獻書期於聽允登壇受命皆是寵光遂之則臣必有爲奪之則臣將不逮上惟君命乃獲始終且使臣又全進退自昭聖德未爽舊章仰望鴻恩臣某

無任迫切悸恐之至

第二表

臣某言去冬以持衡力竭待罪年深曾披肺肝乞免機務
兼遇嶺南節度使知柔上書求代臣遂仰告聖慈願守遠
藩別立微效陛下未容休罷尚委弼諧旋命貴臣密宣睿
旨臣之去就詎合固違焉敢復拜封章是以苟安廊廟又
移歲序何補國家臣頃者慙懇之時陛下亦降許臣之旨
欲俟他日知柔再有陳情則於此時允臣所請邇來備位
不敢更言上荷皇私且策駑蹇今知柔又貢章表辭甚激

切宗枝將帥事體可從亦繫機宜便合制置速擇交代免失一方倘陛下念知柔陳乞之私察臣披露之懇使之仗鉞委以藩條必能撫諭島夷董集征賦旁資國用粗慰聖心躬親則可以使人廉謹則不令生事擇利而斷全在宸衷當邦家匱乏之時敢違輸貢兵革交侵之際幸保土疆臣與知柔各獲其所伏惟尊號皇帝陛下恭默守位明哲臨人每務永圖以揚丕烈克全君體尤重大臣苟非輔相之間誰能盡窺聖德臣之遭遇獨異等倫臨事出言未嘗不信輸忠抱直無所不知七年以來萬機實重仍逢多難

唯任至愚若非聖明尋合顛敗由茲感激更竭筋骸近者
自量力實不逮今所陳乞未曰退休荷寵出藩臨戎報國
誓秉始終之節兼推糾率之心直寫赤誠冀開元鑒今日
延英殿已具奏聞未蒙聽允輒陳牋翰更冒宸嚴臣某無
任祈恩待命迫切兢悸之至

論內臣朝服狀

皇帝赴齋宮內臣皆服朝服臣檢國朝故事及近代禮令
並無內官朝服助祭之文伏惟皇帝陛下承天御歷聖祚
中興祇見宗祧克陳大禮皆稟高祖太宗之成制必循虞

夏商周之舊經軒冕服章式遵彝憲禮院先准大禮使牒稱得內侍省牒要知內臣朝服品秩禮院已准禮令報訖今參詳近朝事例若內官及諸衛將軍必須製冠服即各依所兼正官隨資品依令式服本官之服事存傳聽且可俯從然亦不分明著在禮令乞聖慈允臣所奏

再論內臣朝服狀

臣今日已時進狀論內官冠服制度未奉聖旨伏以陛下虔事郊禋式遵彝範凡關典禮必守憲章今陛下行先王之大禮而內臣遂服先王之法服來日朝獻大聖祖臣贊

道皇帝行事若侍臣服章有違制度是爲非禮上瀆祖宗
臣期不奉勅臣謬當聖代叨備禮官獲正朝儀死且不朽
脂膏泥滓是所甘心

舟中錄序

乙丑歲冬十一月余以尚書郎得掌誥命庚申歲夏六月
以舍人獲譴佐撫州馳暑道病秋八月自襄陽浮而下舟
行無事因解束書視所爲辭藁翦翦冗碎可存者得五百
四十篇丞相表奏百篇區別編聯爲二十卷夫體正而有
倫辭約而居要始終明白茲所以爲誥也國朝聲名辭臣

率能由是而作堂闔祕邃不與漢魏爭高下而荒學小子
以一日視其冗隙間其可見堂奧而得規摹哉以是代天
子言誠不知而作也古者黜幽不過考三載之績余冒居
六年見考無績用思黜不亦宜乎所編聯不敢以集稱理
諸舟中遂曰舟中錄是年九月錢珣自序於沔陽之南

杜曉

曉字明遠京兆杜陵人昭宗時拜左拾遺召爲翰林學士
知制誥梁祖代唐拜中書舍人開平三年轉工部侍郎充
承旨四年拜中書侍郎平章事仍判戶部友珪之亂死於

兵贈右僕射

匡國節度使馮行襲德政碑

關九五山川關三之關五風水關聖關一神武雪五老關一

字星關二負鼎之關懿關五耿賈政邁黃韓關一若匡國

軍節度陳許汝關二州關食菜關五氏雖系出長樂關一

家遷關一當世緒紛綸關三飛關一相關而平關二正色

以威嚴先郎關一應於關三媛關三猛獸關十石羽林關

江漢氣貫斗牛騰凌追千里之蹤嘯傲負四方之志關十

翁知功名關吐關四有孫喜者聚徒數千人關二莫遏將

字闕十 大驚怖無可柰何公乃白闕于南闕四 軍吏迎謁公

在側擊之闕十之盡闕三 兵闕五 臣闕咸秦闕四 崢嶸繚

字闕三 臨闕十 難前孝子迎闕一而闕一進闕郡以闕十列

字闕二 者闕閑閑歲收租闕一十 倍兵強食闕二十 才誓闕鼓

旗之令南山霧闕二 觀豹闕一 之文西陸闕一 清始見鷹

揚之闕洛邑古稱四戰之地今闕五 粵自艱難久罹瘡痍

字闕二 無闕十 寇愾闕一 去闕者雖大必去便于闕一者雖

字闕二 作嘗闕五 政闕一 要闕十 不闕四 其律闕觀焉先是

字闕一 猾闕一 張闕三 虐闕十 二萬衆闕叛郡邑常虞其蹂

躡闕七密連闕十大兵誠其疆闕盡伏其神明闕四其情

偽闕二量罔欺于圭闕二薪荔闕韓浩屯闕一之闕一矧

字闕一腴盡在梗概闕四未闕三匪遠闕十王乃闕二而闕

而闕一許闕三獨闕一若遐僻之地闕一乃闕三課民闕十

字闕七之闕夜以闕一馳闕一館闕三宿闕十縣界內曾闕母

疾病割股奉養闕三痛願闕十載揚孝治之闕之間俗觀

風阜財述職焉可得稱闕十蘭智闕操絳侯之闕一處不

從闕介遂鎮華陽闕秔稻莫闕一桑闕之容闕一武下

上闕二許名區易枋粵闕一景闕二何闕三十襟帶闕一

字 郊輔車闕之來時不有更張何期俾乂闕二賢闕七公

字闕三節度闕九字闕十本尋源提綱振領害於闕食者民之命也

不可不以勤其闕一穡兵者闕三器也闕二以闕一肅其

號令闕九字闕十刑闕二字闕一吾闕一之矣爾第闕懦者歡悅闕二字闕二穎

悟剛斷闕三字闕一者又闕三素闕二命闕四冬聚舊闕三字闕二十來

而復闕艱闕五之威龔遂去闕二之患闕二字闕二罔倦蕩析咸

歸闕二民寬闕二字闕十夜闕二恤惟刑闕麻麥之宜治彼闕六字

推闕二隄之闕二字闕二慙功自闕一字闕十仰稽前闕二字闕二瞰遺蹤闕二字

祇闕二之謀味闕果應於牧人滯穗闕六字闕一寡婦闕一字闕一年內

闕三 四千三百闕七奏闕一連闕六地而闕咸知闕一物

之方向者公闕三軍衙闕四再闕五規模廳闕三門闕十

雄廣厦翬闕六色路闕類忽有烏鵲羣萃啄食無闕九東

闕三 孤勤瘁南闕五吞螾闕十卻闕七縣百闕年闕一縣

麥秀兩歧闕六覩闕三長社縣闕二一莖四穗闕五不闕

二之闕一蹈闕二仁闕二不足含闕鉤距運籌史闕七平

仗鉞稜威謝闕四方闕十藝軍闕一講學馬上注書揮闕二

立覩飛闕飯帳下之犀渠闕二皆感吮癰樓中之闕一

首蛾眉闕四閨闕四組闕一譚董闕五烟闕二之闕二常

闕五 偃草功著分闕

高飛將闕 洞闕 姝幹闕二 章刃闕四 韃入仕勇敢萬闕七

當路闕二 風生桓桓虎闕一 智闕二 强闕 送昏拯劍斬

頑嚚帝念馮公忠闕三 朝稱闕二 左提右闕七 瑞節望塵

肯悅公至若何闕 類赤眉闕一 同白額乃芟乃夷乃梟乃

磔外戶不闕一 下民闕七 食為天闕一 鼓闕五 田耒耜接

肘闕 保豐穰取之盡徹巨害既去纖惡皆除頒宣闕二 慎

恤刑書闕四 圉圉常虛闕一 徭薄闕一 政叶闕一 盧老闕二

懷闕 交映朱扉洞開闕一 優闕三 燕臺惠洽闕一 里闕一

字飛九陔闕四和氣充塞麥秀兩歧禽吞闕一騰闕五人
頌德